

Elebitasuna alor orotan bermatzeko eskatu diote UPNri gida telefonikoen kontura

■ *Ikastolen Elkartearen antzera, EA gida «akasdunak» banatzeko prest azaldu da*

Erredakzioa / **Iruñea**

NAFARROA hitza soilik duten gida telefonikoen aferak aitzina jarraitzen du. Atzo Nafarroako AEK erakundeak eskatu zion UPNko gobernuari euskaldunen eskubideak erdaldunenak bezala bermatzeko. Lizarrako EA 9.000 gida telefoniko «akasdun» banatzeko prest dago, eta HBk gida horiek eskuratzera animatu zituen nafarrrak.

AEKren erranetan, gida telefonikoen gertaera «bitxi» honetan UPNk eta Nafarroako Gobernuak elebitasunaren irizpidea argudiatu dute erdaldunen eskubideak bermatzeko. «Agudo ibili da, ez du diru kaltetan erreparatu, ez erabilgarritasunean ere, dena elebitasunaren izenean», adierazi du AEK-k. Hori dela eta, Gobernuak bizitzaren arlo guzietan hizkuntza eskubideei arreta bera erakutsi beharko liekeela uste du AEK-k: «Ez bakarrik telefono gidetan, argitarapen ofizial publiko guztietan, euskaldunek Osasunbidera edo epaitegira jotzen dutenean, unibertsitatean, institutuan, haurtzaindegietan edo eskoletan euskaraz ikasi nahi dutenekin, zein hedabide eta zerbitzu publiko guztietan ere».

Hainbat erreakzio

Bestalde, eta Nafarroako Ikastolen Elkartek egin zuen antzera, Lizarrako Eusko Alkartasunak atzo adierazi zuenez, Telefonicako lehendakari Juan de Villalongaren aitzinean beharrezko gestioak egiten ari dira Lizarrerrian banatzen hasi ziren gida telefonikoak eskatzen duten abonatuak helarazteko. Telefonikaren erantzunaren zain daude.

Halaber, Nafarroako Herri Batasunak *Nafarroa* hitza soilik duten gida telefonikoak eskatzeko animatu ditu nafarrrak. HBren aburuz, «UPNk, berriz ere, agertu du euskarari dion fobia».

Arazoak sortu ditu errepideetan eguraldi txarrarekin batera etorri den elurrak

Datozen egunetan ere kontuz ibili beharko da txarrera egingo baitu giroak

Erredakzioa / **Donostia**

Eguraldi txarra. Elurra, euri gogorra, eta harri txingorra izan ziren nagusi atzo Euskal Herrian. Ondorioz, hainbat arazo sortu ziren errepideetan. Datozen orduetan ere eguraldi kaxkarra izango da. Litekeena da okerre-egitea. Beraz, kontu handiz gidatzeko eskatu dute trafiko arduradunek.

ARAZO ASKO sortu zituen atzo Euskal Herriko errepideetan eguraldi txarrak. Tenperatura jaitsierak elurra ekarri zuen, eta ondorioz mendate gehienetatik ibiltzeko arazoak sortu.

Izabatik Zuberoara arteko errepidea itxi behar izan zuten.

Halaber, Nafarroan Izabatik kamioiak hertsia zuten ibilbidea, eta autoek kateak behar zituzten.

Araban, oster, Herrera portua kamioientzat eta autobusentzat hertsia zuten, eta autoak katekin ibili ziren. Bernedo, Atazeta, Zaldiaran eta Opakua mendateetan elurra etengabe ari zuela eta autoek mantso-mantso ibili behar zuten.

Gainontzeko herrialdeetan elurra gailurretan baino agertu ez bazen ere, euri gogorrak eta harri txingorrak errepidea gogortu zuten, eta hainbat arazo sortu.

Egoera horren aurrean, kontu handiarekin gidatzeko eskatu dute trafiko arduradunek, eta kateak eramateko gidatu ahal izateko.

Horrez gainera, litekeena da giroak okerrera egitea. Beraz, autoa hartu behar izanez gero, kontuz.



JAGOBA MANTEROLA

Kamioiek atzo hainbat pasabide hertsirik izan zituzten elurraren eraginez.

Lagun bat hil da Bergaran, auto istripuan

■ PERTSONA bat hil zen atzo arratsaldean Bergarako Angiozar auzoan (Gipuzkoa) auto istripuan. 16:00etan izan zen istripua, eta ospitalera eraman zuten larri zauriturik ezbeharra gertatu eta berehala. Ondoren, ospitaleko arduradunek adierazi zuten ezin izan zutela ezer egin. Arratsaldeko 18:00ak aldera hil zen.

Horrez gainera, herenegun gau aldera izan ziren ezbeharrrak Iparraldean. Hildako bat eta bederatzi lagun zauritu dira ostiral arratsaldean iragandako hiru bide istriputan. Lehen ezbeharra gertatu zen arratsaldean Baionan, Grenet zubiaren ondoren. Hiru autok elkar jo ondoren, hiru lagun arinki zauritu ziren.

Bigarren istripua beranduago iragan zen, Baiona eta Donibane-Garazi arteko bidean. Arratsaldeko 17.30etan, beste hiru autorek arteko istripua iragan zen Ustaritzeko Herauritz auzoan. Renault auto bat lerratu zen, eta pareko autoaren aurka jo zuen. Handik zeterren zen beste auto bat ez zen gelditu ahal izan. Bi

lehen autoetako gidariak larriki kolpatu ziren, eta beste hiru lagunak kolpe arinak izan zituzten.

Azkenik, Ezpeletan 18:00etan, bidea lerrakorra izanez, auto bat uzkailli zen bide bazterreko amildegi batean. L. S. 75 urteko emaztea kolpez hil zen. Bere alaba Michele, aldiz, larri kolpatua izan zen eta Baionan ospitaleratu zuten.